


大智度論

第七十三

二百十五
表三

48909



Vertical stamp or inscription, possibly containing characters or a date.

Fragmentary characters or markings, possibly remnants of a signature or date.

大智度論卷第七十三

龍樹菩薩造

姚秦三藏法師鳩摩羅什譯

釋阿鞞跋致品第五十五

須菩提白佛言世尊以何等行何等類何等
相貌知是阿鞞跋致菩薩摩訶薩佛告須菩
提菩薩摩訶薩能知凡夫地聲聞地辟支佛
地佛地是諸地如相中無二無別亦不念亦
不分別入是如中聞是事直過無疑何以故
是如中無一無二相故是菩薩摩訶薩亦不
作無益語但說利益相應語不視他人長短
須菩提以是行類相貌知是阿鞞跋致菩薩
摩訶薩須菩提言世尊復以何行類相貌

知是阿鞞跋致菩薩摩訶薩佛告須菩提若
一切法無行無類無相貌當知是阿鞞跋致
菩薩摩訶薩須菩提白佛言世尊若一切法
無行無類無相貌菩薩於何等法轉名不轉
佛言若菩薩摩訶薩色中轉受想行識中轉
是名菩薩不轉復次須菩提菩薩摩訶薩檀
波羅蜜中轉乃至般若波羅蜜中轉內空中
乃至無法有法空中轉四念處中乃至十八
不共法中轉聲聞辟支佛地中轉乃至阿耨
多羅三藐三菩提中轉當知是菩薩摩訶薩
不轉何以故須菩提色性無是菩薩何所住
乃至阿耨多羅三藐三菩提性無是菩薩何

所任復次須菩提菩薩摩訶薩不觀外道沙
門婆羅門面類言語不作是念是諸外道若
沙門若婆羅門實知實見若說正見無有是
事復次菩薩不生疑不著戒取不墮邪見亦
不求世俗吉事以爲清淨不以華香瓔珞幡
蓋妓樂禮拜供養諸天須菩提以是行類相
貌當知是名阿鞞跋致菩薩摩訶薩復次須
菩提阿鞞跋致菩薩摩訶薩常不生下賤家
乃至不生八難之處常不受女人身須菩提
以是行類相貌當知是名阿鞞跋致菩薩摩
訶薩復次須菩提菩薩摩訶薩常行十善道
自不殺生不教人殺生讚歎不殺生法歡喜

讚歎不殺生者乃至自不邪見不教人邪見
亦不讚歎邪見法不歡喜讚歎行邪見者須
菩提以是行類相貌當知是名阿鞞跋致菩
薩摩訶薩復次須菩提菩薩摩訶薩乃至夢
中亦不行十不善道以是行類相貌當知是
名阿鞞跋致菩薩摩訶薩復次須菩提菩薩
摩訶薩爲益一切衆生故行檀波羅蜜乃至
爲益一切衆生故行般若波羅蜜須菩提以
是行類相貌當知是名阿鞞跋致菩薩摩訶
薩復次須菩提菩薩摩訶薩所有諸法受誦
讀說正憶念所謂修妬路乃至優波提舍是
菩薩法施時作是念是法施因緣故滿一切

衆生願以是法施功德與一切衆生共之。迴
向阿耨多羅三藐三菩提。須菩提。以是行類
相貌當知是名阿鞞跋致菩薩摩訶薩。復次
須菩提。菩薩摩訶薩於甚深法中不疑不悔
須菩提言。世尊。菩薩於甚深法中何因緣故
不疑不悔。佛言。是阿鞞跋致菩薩。都不見有
法可生疑處。若色受想行識。乃至阿耨多羅
三藐三菩提。不見法可生疑處。悔處。須菩提。
以是行類相貌當知是名阿鞞跋致菩薩摩
訶薩。復次。須菩提。菩薩摩訶薩身口意業。柔
輒。須菩提。以是行類相貌當知是名阿鞞跋
致菩薩摩訶薩。復次。須菩提。菩薩摩訶薩以

慈身口意業成就。須菩提以是行類相貌當
知。是名阿鞞跋致。菩薩摩訶薩。復次。須菩提。
菩薩摩訶薩。不與五蓋俱。婬欲瞋恚睡眠掉
悔疑。須菩提以是行類相貌當知。是名阿鞞
跋致。菩薩摩訶薩。復次。須菩提。菩薩摩訶薩。
一切處無所愛著。須菩提以是行類相貌當
知。是名阿鞞跋致。菩薩摩訶薩。復次。須菩提。
菩薩摩訶薩。出入去來坐卧行住。常念一心。
出入去來坐卧行住。舉足下足。安隱庠序。常
念一心。視地而行。須菩提以是行類相貌當
知。是名阿鞞跋致。菩薩摩訶薩。復次。須菩提。
菩薩摩訶薩。所著衣服及諸卧具。又不憍穢。

好樂淨潔少於疾病。須菩提以是行類相貌。當知是名阿鞞跋致。菩薩摩訶薩復次。須菩提。提常人身中有八萬戶。虫侵食其身。是阿鞞跋致。菩薩摩訶薩身無是虫。何以故。是菩薩功德過出世間。以是故。是菩薩無是虫。戶是菩薩功德增益。隨其功德。得身清淨。得心清淨。須菩提以是行類相貌。當知是名阿鞞跋致。菩薩摩訶薩。須菩提白佛言。世尊云。何菩薩摩訶薩。得身清淨。得心清淨。佛言。菩薩摩訶薩。隨其所得。增益善根。滅除心曲。心邪。須菩提。是名菩薩摩訶薩。身清淨。心清淨。以是身心清淨。故能過聲聞辟支佛地。入菩薩位。

中須菩提以是行類相貌當知是名阿鞞跋致菩薩摩訶薩復次須菩提菩薩摩訶薩不貴利養雖行十二頭陀不貴阿蘭若法乃至不貴但三衣法須菩提以是行類相貌當知是名阿鞞跋致菩薩摩訶薩復次須菩提菩薩摩訶薩常不生慳貪心不生破戒心瞋動

心懈怠心散亂心不生愚癡心不生嫉妬心須菩提以是行類相貌當知是名阿鞞跋致菩薩摩訶薩復次須菩提菩薩摩訶薩心住不動智慧深入一心聽受所從聞法及世間事皆與般若波羅蜜合是菩薩摩訶薩不見產業之事不入法性者是事一切皆見與

般若波羅蜜合以是因緣故須菩提是名阿
鞞跋致菩薩阿鞞跋致相

問曰上來處處說阿鞞跋致相今何以復問
答曰上雖處處略說今欲廣說此中多是阿
鞞跋致相故名阿鞞跋致品復次上來解般
若波羅蜜相次說魔因緣壞般若今說信受
般若波羅蜜者阿鞞跋致欲說其相貌故須
菩提問復次菩薩初發心來所行因緣所得
果報是阿鞞跋致受記必當作佛如人受職
已得印信心無復疑又如聲聞人所行衆行
皆爲四沙門果阿鞞跋致是決定安隱地過
凡夫不入二乘地雖未成佛道能爲世間作

福田是事微妙難得故須菩提問其相貌佛
本命須菩提說般若波羅蜜故須菩提問世
尊阿鞞跋致有何行類相貌問曰是三事有
何等異荅曰有人言是三事皆一義以此知
是阿鞞跋致非阿鞞跋致有人言行名是阿
鞞跋致菩薩身口意業異於他人以此行表
阿鞞跋致甚深智慧類者分別知諸菩薩是
阿鞞跋致非阿鞞跋致相貌者除行類餘種
種因緣得知阿鞞跋致相佛說義趣若菩薩
能具足五波羅蜜深入般若波羅蜜方便力
故不著般若波羅蜜但觀如所謂諸法實相
菩薩尔時不以凡夫二乘地為下賤不以佛

地爲高貴入諸法如故諸法如中無有分別
二法但以如入如更無餘事亦不分別取相
何以故如平等故能如是入者即入諸佛法
藏心不生疑更求諸法決定相是故經說須
菩提凡夫地乃至佛地如相中無二無別得
如是法名阿鞞跋致行類相貌復次略說是
義菩薩因諸法如所謂畢竟空捨一切世間
事亦不任畢竟空何以故得諸法畢竟清淨
實相故菩薩若聞是無依止法心無疑悔不
念依止自上事是阿鞞跋致正體自是以下
盡是畢竟空行果得畢竟空故心淳熟寂滅
相不說無益語所說常是法不是非法所說

皆實非妄說所言柔軟不麤獷皆以慈悲心
說不以瞋恚心所說應時常得機會觀察人
心隨其方俗今此中略說利益之言若教佛
道若二乘若人天道若今世得非罪樂常遠
離口四惡故於衆生中慈悲心大故又能自
摧薄諸煩惱故是以能種種因緣說諸利益
語問曰聲聞人直趣涅槃可不觀他人菩薩
視衆生如子常欲教化云何不觀其長短答
曰若衆生不可伏折不可化度如是等莫觀
何以故若以好心教詔則謂嫉已如刀刺心
既無所益更增其罪是故不觀長短復次菩
薩應作是念如諸佛一切智煩惱習盡尚不

能盡度衆生何況我未得菩薩神通未得無礙智云何能普觀衆生阿鞞跋致有得神通者有不得者得阿鞞跋致已別修神通道乃得若先得神通者不具足故不能遍觀問曰須菩提初問行類相貌佛何以不即荅無行類相貌今此中方說荅曰初問時衆生未著阿鞞

跋致相故佛荅或說空相或說有相今以衆生著阿鞞跋致相欲從凡夫入阿鞞跋致地是故佛說一切無行無類無相貌須菩提以更問若諸法盡空者何以言於何法轉名不轉法應當從凡夫地轉於佛地不轉佛荅若菩薩能觀色等諸法空無所有轉諸著心故

於佛道中不轉色等法和合因緣生菩薩知
是有爲過罪故不應此中住諸法空故能轉
著心轉著心故名不轉復次阿鞞跋致菩薩
入正位故心決定不疑一切外道中有實智
若有實智不名外道如是名阿鞞跋致相問
曰今說不生疑後說深法不疑是二不疑有何
差別荅曰今不疑者四諦中如須陀洹所斷
後不疑者於佛所知深法中不疑是菩薩福
德智慧力故雖不作須陀洹未作佛而能無
此二疑戒取名外道戒行此外道戒不得涅槃
餘四見皆名邪見深信業因緣果報故不
求吉事不以華香等供養夫求道破憍慢根

本故常不生下賤家不障他功德常行勸助
故不生八難處折薄婬欲遠離諂媚心故不
受女人身復次餘人雖行十善道或一或二
或三不能具足四種是菩薩大悲心深愛善
法故具足行四種常修集十善道故乃至夢
中不行十不善道餘人所修福德但自爲身
小菩薩雖爲衆生亦自爲己阿鞞跋致諸所
作福皆爲衆生不爲其身若福德可以與人
則盡與衆生更自修習但不可得與故菩薩
以十二部經教化衆生亦但爲衆生不自爲
已復次菩薩信等五根利故雖未作佛於諸
法能信佛此中更語空因緣菩薩不見色等

法故無生疑處復次是菩薩常行慈悲心故
意業柔軟意業柔軟故身口慈業成就問曰
慈悲心外道亦有云何說是阿鞞跋致相答
曰外道雖有而不深不能遍念衆生亦不常
有非諸法實相和合故菩薩不尔復次是菩
薩呵五欲除五蓋入五支初禪不與五蓋俱
五蓋覆心能耗減智慧破佛道開魔路故是
菩薩知一切有爲作法虛妄不實如幻如夢
無爲法空無所有寂滅相是故於一切處無
所愛著於衆生中乃至佛亦不著於法中乃
至涅槃亦不著瞋辱罪小菩薩已斷故不說
愛深微難斷故今說復次是菩薩深入禪定

故守護一切衆生守護一切衆生故常一心
念不惱衆生不破戒故出入來去等安詳一
心舉足下足視地而行者爲護衆生爲避亂
心故復次是菩薩久修集無量無邊善法身
中無八萬戶虫亦少病痛故衣服卧具等常
淨潔無污得諸法實相等善根力故身中無
八萬戶虫心清淨故身口等亦清淨離虛誑
邪曲等下賤煩惱故心清淨二事清淨故雖
行世間離諸逼迫苦惱心不厭沒故出過聲
聞辟支佛地是菩薩貴佛道故不貴利養雖
行頭陀不貴是法以是法是究竟道因緣少
分非究竟道是名阿鞞跋致菩薩行類相貌

問曰是菩薩未得佛道未斷諸煩惱云何常
不生慳貪等諸惡心答曰阿鞞跋致菩薩得
無生法忍時斷諸煩惱但未斷習若不斷者
云何常能不生諸慳貪等障道心如經說須
陀洹乃至阿羅漢即是菩薩無生法忍復次
有人言菩薩行六波羅蜜深修集諸功德故
諸煩惱折薄心中不生故是名常不生復次
是菩薩無量世行禪波羅蜜故心住不動積
習般若故深入智慧是菩薩知法味微妙故
從他聞法一心聽受樂法情深故所聞若三
乘法若外道及世間法自心妙故皆與般若
和合不破法相譬如壯夫無病所食之物無

不消化又如佛得最上味相雖復苦辛不美
之食在佛口中皆是上味又如煮石蜜欲熟
時種種物內中皆成石蜜妙味力盛故菩薩
亦如是般若波羅蜜力盛故種種諸法能令
皆與般若合為一味無諸過罪復次世間事
者菩薩所起身口諸業皆為憐愍度衆生故
此憐愍心皆入般若波羅蜜初門又復世間
諸事因緣乃至坐起行步飲食言語常念安
隱衆生是來去等法皆入法性如破來去中
說產業之事亦如是是名阿鞞跋致相
復次須菩提惡魔於阿鞞跋致菩薩前化作
八大地獄一一地獄中有千億萬菩薩皆被

燒煮受諸辛酸苦毒語菩薩言是諸菩薩皆是阿鞞跋致佛所授記墮大地獄中汝若爲佛授阿鞞跋致記者當入是大地獄中佛爲授汝地獄記汝不知還捨菩薩心可得不墮地獄得生天上須菩提若是菩薩見是事聞是事心不動不疑不驚你是念阿鞞跋致菩薩若墮地獄畜生餓鬼中終無是處須菩提以是行類相貌當知是名阿鞞跋致菩薩摩訶薩復次須菩提惡魔化作比丘被服來至菩薩所語菩薩言汝先聞應如是淨修六波羅蜜乃至應如是修行得阿耨多羅三藐三菩提是事汝疾悔捨汝先於過去未來現在

諸佛戶從初發心乃至法住於其中間所作
善根隨喜迴向阿耨多羅三藐三菩提是事
汝亦疾放捨若汝疾捨我當語汝真佛法汝
先所聞皆非佛法非佛教皆是文飾合集作
耳我所說是真佛法若是菩薩聞作是說心
驚疑悔當知是菩薩未得諸佛受記未定狂
阿鞞跋致性中若是菩薩心不動不驚不疑
不悔隨順依止無作無生法不信他語不隨
他行行六波羅蜜時不隨他語乃至行阿耨
多羅三藐三菩提時亦不隨他語須菩提譬
如漏盡阿羅漢不信他語不隨他行現見諸
法實相惡魔不能轉如是須菩提阿鞞跋致

菩薩摩訶薩亦如是求聲聞道辟支佛道人
不能破壞不能折伏其心須菩提是菩薩摩
訶薩必定任阿鞞跋致地中不隨他語乃至
佛語不直信取何況求聲聞辟支佛人及惡
魔外道梵志語終無是處何以故是菩薩不
見有法可隨信者所謂色若受想行識若色
如乃至識如乃至不見阿耨多羅三藐三菩
提何況阿耨多羅三藐三菩提如須菩提以
是行類相貌當知是名阿鞞跋致菩薩摩訶
薩復次須菩提魔作比丘身來到菩薩所語
菩薩言汝所行者是生死法非薩婆若道汝今
身取苦盡證是時惡魔爲菩薩用世間行說

似道法是似道法三界繫所謂骨相若初禪
乃至非有想非無想語善男子用是道用是
行當得須陀洹果乃至當得阿羅漢果汝行
是道今世苦盡汝用受生死中種種苦惱爲
今是四大身尚不用受何況當更受來身須
菩提若是菩薩摩訶薩心不驚不疑不悔作
是念是比丘益我不少爲我說似道法行是
似道法不得至須陀洹果證不得至阿羅漢辟
支佛道證何況得至阿耨多羅三藐三菩提
是菩薩摩訶薩益復歡喜作是念是比丘益
我不少爲我說障道法我知是障道法不障
學三乘道是時惡魔知菩薩歡喜作是言善

男子汝欲見是菩薩摩訶薩供養如恒河沙
等諸佛衣被飲食卧具醫藥資生所須亦於
如恒河沙等諸佛所行檀波羅蜜尸羅波羅
蜜羸提波羅蜜毗梨耶波羅蜜禪波羅蜜般
若波羅蜜亦親近如恒河沙等諸佛諮問菩
薩摩訶薩道世尊菩薩摩訶薩云何住菩薩
摩訶薩乘云何行檀波羅蜜尸羅波羅蜜羸
提波羅蜜毗梨耶波羅蜜禪波羅蜜般若波
羅蜜四念處乃至大慈大悲是菩薩摩訶薩
如佛所教如是住如是行如是修是菩薩摩
訶薩如是教如是學尚不得阿耨多羅三藐
三菩提不得薩婆若何況汝當得阿耨多羅

三藐三菩提若菩薩摩訶薩聞是事心不異
不驚益復歡喜作是念是比丘益我不少爲
我說障道法是障道法不得須隨洄道乃至
不得阿羅漢辟支佛道何況得阿耨多羅三
藐三菩提是時惡魔知是菩薩心不沒不驚
即於是處化作比丘語菩薩言此皆是發
意求佛道菩薩今皆任阿羅漢地是輩尚不
得阿耨多羅三藐三菩提汝云何能得若菩
薩摩訶薩即作是念此是惡魔說相似道法
菩薩摩訶薩行般若波羅蜜不應轉阿耨多
羅三藐三菩提心亦不應墮聲聞辟支佛道
中復作是念行檀波羅蜜尸羅波羅蜜羼提

波羅蜜毗梨耶波羅蜜禪波羅蜜般若波羅
蜜乃至一切種智不得阿耨多羅三藐三菩
提心無有是處須菩提以是行類相貌當知
是名阿鞞跋致菩薩摩訶薩復次須菩提菩
薩摩訶薩作是念若菩薩能如佛所說不遠
離般若波羅蜜心乃至一切種智是菩薩終
不退阿耨多羅三藐三菩提若菩薩覺知魔
事亦不失阿耨多羅三藐三菩提以是行類
相貌當知阿鞞跋致菩薩摩訶薩相須菩提
白佛言世尊於何法轉名爲不轉佛言於色
相轉於受想行識相轉於十二入相十八界
相婬欲瞋恚愚癡相邪見相四念處相乃至

聲聞辟支佛相乃至佛相轉以是故名爲不退轉菩薩摩訶薩相何以故是阿鞞跋致菩薩摩訶薩以是自相空法入菩薩位乃至少許法不可得不可得故不作不作故不生是名無生法忍菩薩摩訶薩以是行類相貌當知是阿鞞跋致菩薩摩訶薩

釋曰魔了了知是菩薩是阿鞞跋致者不復沮壞若未了了知者則種種因緣驗試破壞或作八大地獄化作無數菩薩在中燒者語菩薩言此皆是阿鞞跋致諸佛授記者汝若受記爲受地獄記問曰惡魔何因緣故言行善者受地獄記答曰惡魔以是菩薩欲代一

切衆生受苦故言受地獄記汝若行福德生
天者則自爲身無豫衆生事若菩薩聞是事
心動疑悔若信受魔語當知是未受阿鞞跋
致記若菩薩聞是事不疑不動不驚作是念
阿鞞跋致得諸法實相故不著一切法不著
一切法故乃至不生小罪何況三惡道罪如火

中有水水中生火無有是處復有魔作比丘
被服來語菩薩汝先從小師聞修六波羅蜜
法皆是虛妄所集隨喜心功德亦是虛誑汝
先所聞皆是虛誑文飾不真非是佛口所說
今我爲汝說者真是佛法汝疾捨之若以菩
薩聞是心動瞋疑當知諸佛未與受記譬如

僞金火燒磨打若黑若赤若白乃知非真若
菩薩聞是不瞋不疑隨無生無滅無起無作
法行於六波羅蜜相中自知不隨於他語當
知是真阿鞞跋致譬如阿羅漢漏盡故諸魔
事來不能破阿鞞跋致菩薩亦如是無能降
伏者自現前知諸法實相故乃至魔作佛身
來所說異於法相者亦不信受譬如狗著師
子皮諸獸見之雖怖聞聲則知是狗何況變
作餘身等此中佛自說因緣是菩薩見色等
法空故誰當隨他語復次惡魔來作比丘身
語菩薩言是六波羅蜜皆是生死道布施等
福德因緣故欲界中受福樂禪波羅蜜因緣

故色界中受樂是般若波羅蜜無定相故名
虛誑法迴轉五道中不能自出是生死道人
誑汝言是一切種智道我今實語汝取涅槃
今世盡苦是菩薩若嘿然魔即爲說似道法
若觀三十六種不淨若觀骨人若出入息因
是道得四禪四無色定汝因是禪定可得須
陀洹乃至阿羅漢汝今此身是罪因緣所生
佛說彈指頃不讚更受身何況久住生死中
阿鞞跋致菩薩聞是事心喜作是念是比丘
大益我爲我說似道法我得是似道法即知
真道如行路人知邪徑則知正道障道亦如
是阿鞞跋致是大人貴重故不與是比丘諍

語魔見菩薩嘿然歡喜言是人信受我語語
菩薩言善男子有無量菩薩供養如恒河沙
等諸佛諮問奉行六波羅蜜及菩薩道法面
受佛教盡受行諸菩薩行尚不得無上道今
皆作阿羅漢汝欲見菩薩不聞是事已嘿然
魔於是處即化作無數阿羅漢比丘語菩薩
言是諸比丘皆久行無上道今皆取阿羅漢
汝今去何獨欲作佛阿鞞跋致即復歡喜是
比丘爲我說似道障道法是菩薩實行六波
羅蜜諸功德定不退墮二乘如佛所說心常
不離六波羅蜜等諸功德不得無上道無有
是處菩薩若知是魔事則大得利益而無所

失以是故菩薩心不動轉是名阿鞞跋致相
尔時須菩提白佛言世尊於何法轉名為不
轉佛言於色相等法中轉還上略說今廣說
若菩薩於色等相皆能轉是名行一切法性
空得無生法忍入菩薩位無生忍者乃至微
細法不可得何況大是名無生得是無生法
不作不起諸業行是名得無生法忍得無生
法忍菩薩是名阿鞞跋致如是等無量行類
相貌是阿鞞跋致相

大智度論釋轉不退輪品第五十六上

復次須菩提惡魔到菩薩所壞其心作是言
薩婆若與虛空等無所有相諸法亦與虛空

等空無有相虛空等諸法空無所有相中無
有得阿耨多羅三藐三菩提者亦無有不得
者是諸法皆如虛空無所有相汝唐受勤苦
汝所聞阿耨多羅三藐三菩提是魔事非佛
所說汝當放捨是願汝莫長夜受是不安隱
憂苦墮惡道是諸善男子善女人聞是呵時

應如是念是惡魔事壞我阿耨多羅三藐三
菩提心諸法雖如虛空無所有自相空而衆
生不知不見不解我亦以如虛空等無所有
自相空大莊嚴得一切種智爲衆生說此法
令得解脫得須陀洹果斯陀含果阿那含果
阿羅漢果辟支佛道阿耨多羅三藐三菩提

須菩提菩薩摩訶薩從初發意已來聞是法
應堅固其心不動不轉菩薩摩訶薩以是堅
固心不動不轉心行六波羅蜜當入菩薩位
須菩提白佛言世尊不轉故名阿鞞跋致轉
故亦名阿鞞跋致佛言不轉故名阿鞞跋致
轉故亦名阿鞞跋致須菩提白佛言世尊云
何不轉故名阿鞞跋致轉故亦名阿鞞跋致
佛言須菩提若菩薩摩訶薩於聲聞地辟支
佛地不轉是故名不轉若菩薩摩訶薩於聲
聞地辟支佛地轉是故亦名不轉須菩提以
是行類相貌當知是名阿鞞跋致菩薩摩訶
薩相以是行類相貌故惡魔不能壞其意今離

阿耨多羅三藐三菩提復次須菩提阿鞞跋
致菩薩摩訶薩若欲入初禪第二第三第四
禪乃至滅定禪即得入復次須菩提阿鞞跋
致菩薩摩訶薩若欲修四念處乃至八聖道
分空無相無作三昧乃至五神通即能修是
菩薩雖修四念處乃至五神通是人不受四
念處果雖修諸禪不受諸禪果乃至不受滅
定禪果不證須陀洹果乃至不證辟支佛道
是菩薩故爲衆生受身隨其所應而利益之
須菩提以是行類相貌當知是名阿鞞跋致
菩薩摩訶薩復次須菩提阿鞞跋致菩薩摩
訶薩常憶念阿耨多羅三藐三菩提終不離

薩婆若心故不貴色不貴相不貴聲聞辟支
佛不貴檀波羅蜜尸羅波羅蜜羼提波羅蜜
毗梨耶波羅蜜禪波羅蜜般若波羅蜜不貴
四禪四無量心四無色定不貴五神通不貴
四念處乃至八聖道分不貴佛十力乃至十
八不共法不貴淨佛世界不貴成就衆生不
貴見佛不貴種善根何以故一切法自相空
不見可貴法能生貴心者何以故是一切法
與虛空等無所有自相空須菩提是阿鞞跋
致菩薩摩訶薩成就是心於四種儀中出入
來去坐卧行住一心不亂須菩提以是行類
相貌當知是阿鞞跋致菩薩摩訶薩復次須

菩提阿鞞跋致菩薩摩訶薩若在居家以方便力爲利益衆生故受五欲布施衆生須食與食須飲與飲衣服卧具乃至資生所須盡給與之是菩薩自行檀波羅蜜教人行檀讚歎行檀法歡喜讚歎行檀波羅蜜者尸羅波羅蜜乃至般若波羅蜜亦如是須菩提阿鞞跋致菩薩摩訶薩在家時能以滿閻浮提珍寶施與衆生乃至三千大千世界滿中珍寶給施衆生亦不自爲常修梵行不凌易虜掠他人令其憂惱須菩提以是行類相貌當知是名阿鞞跋致菩薩摩訶薩復次須菩提阿鞞跋致是菩薩摩訶薩執金剛神王常隨逐

作是願是菩薩摩訶薩當得阿耨多羅三藐
三菩提我常隨逐乃至五姓執金剛神常隨
守護以是故若天若魔若梵若餘世間大力
者不能破壞是菩薩摩訶薩薩婆若心乃至
得阿耨多羅三藐三菩提須菩提是名菩薩
摩訶薩阿鞞跋致相復次須菩提菩薩摩訶
薩常具足菩薩五根信根精進根念根定根
慧根是名阿鞞跋致相復次須菩提阿鞞跋
致菩薩摩訶薩為上人不為下人須菩提白
佛言世尊云何為上人佛告須菩提若菩薩
摩訶薩一心行阿耨多羅三藐三菩提心不
散亂是名上人以是行類相貌當知是阿鞞

跋致相復次須菩提阿鞞跋致菩薩一心常
念佛道不作呪術合藥不呪鬼神令著男女
問其吉凶男女祿相壽命長短何以故須菩
提是菩薩摩訶薩知諸法自相空不見諸法
相故行淨命須菩提以是行類相貌當知是
名阿鞞跋致菩薩摩訶薩相

釋曰復有阿鞞跋致菩薩相若惡魔作是言
薩婆若與虛空等薩婆若有種種名字或說
一切智或說一切種智或說無上道或說無
量諸佛法或說菩提皆是薩婆若名字此中
說薩婆若當知是阿耨多羅三藐三菩提一
切菩薩皆願欲得薩婆若魔來欲壞作是言

是薩婆若空無所有但諸師誑汝耳如虛空
無所有無色無形不可知薩婆若亦如是是
故說與虛空等諸法者六波羅蜜等趣薩婆
若助道法是法亦空薩婆若空無所有相諸
法但有名字無有實事是中無得薩婆若者
無趣薩婆若無有助道者汝唐受辛苦汝師
常教汝離魔事薩婆若即是魔何以故捨涅
槃取生死故汝先所聞經若六波羅蜜義非
是佛法皆是人造汝今疾悔捨是邪心若不
捨長夜受三惡道苦阿鞞跋致菩薩聞是事
即覺知魔事是魔毀訾薩婆若欲令我遠離
阿耨多羅三藐三菩提何以故一切法雖空

無所有而凡夫衆生顛倒覆心故不知不見
我亦當以自相空莊嚴得一切智爲衆生說
法若一切法空我以實莊嚴是不相應善諸
法空莊嚴亦空者是則相稱爲衆生說法亦
如是令衆生得須陁洹果須陁洹果有二種
一者三結斷無爲法二者空無相無作三昧
相應有爲須陁洹果是二皆空有爲法中三
脫門故空無爲法中無生無住無滅相故即
是空乃至阿耨多羅三藐三菩提亦如是阿
鞞跋致菩薩從初發意已來聞是法堅固其
心不動不轉一切諸煩惱箭不入故名爲堅
一切外道魔民不能轉故名不動於阿耨多

羅三藐三菩提不退故名不轉是菩薩以如
是三種心行六波羅蜜入菩薩位菩薩位義
如先說是名入菩薩位入菩薩位者名阿鞞
跋致須菩提問不轉故名阿鞞跋致轉故名
阿鞞跋致佛二種答以二諦故所謂世諦第
一義諦若菩薩入菩薩位轉聲聞辟支佛心
直入菩薩位是名轉不轉者入阿鞞跋致第
一義諸法一相中所謂無相尚無一乘定相
何況三乘則無所轉無所轉故名阿鞞跋致
復次阿鞞跋致雖行欲界法度衆生於禪定出
入自在於禪定自在故若欲教化他人修四
念處乃至八聖道分三解脫門乃至五神通

皆得自在。雖入禪定，其心清淨柔順，故不受長壽夭福於欲界。教化雖修，四念處道法亦不證。須陀洹果乃至不證辟支佛道，是菩薩觀十方國土，知何處有可利益衆生處，故爲受身。生其國如是等名阿鞞跋致，相是菩薩一心深念，常不離阿耨多羅三藐三菩提，故但貴阿耨多羅三藐三菩提，不貴餘事。所謂諸佛三十二相金色身，不捨本願度衆生，故不貴聲聞辟支佛道。是人貴無所得，畢竟空故。不貴是布施乃至不貴種善根，何況五欲世間利養。何以故？菩薩觀一切法自相空，不見實定法。可生貴心，復次有人有所貪貴，故

心動不能自安若得則歡喜失則憂感菩薩
無所貴無所貪故至於得失心清淨不動故
身行口行調和不異故身四威儀一心常念
無所違失復次深入禪波羅蜜故身四威儀
無所違失問曰經中說阿鞞跋致菩薩方便
力爲利益衆生故受五欲受何等方便答曰
譬如以鉗取火雖捉而不燒五欲如火能燒
人善根是菩薩思惟我出家一身云何能以
布施攝衆生衆生多須飲食衣服須法者少
菩薩爲攝衆生故故生富貴家布施衆生恣
其所須出家在家衆生能廣利益譬如大地
人民鳥獸皆蒙利潤是時四種行六波羅蜜

若出家讚布施或有人言汝自一身無財但
教人施則不信受是故菩薩方便作白衣以
財充滿一切而勸行施人則信受是菩薩或
作轉輪聖王心念施時則滿閻浮提珍寶如
頂生王宮殿中心生欲寶則寶至于膝或作
帝釋或作梵王能雨珍寶滿三千世界供養
於佛充滿一切為攝衆生故而自不受人受
五欲則心生憍慢凌易於人是人常斷姪欲
故諸煩惱薄不生憍慢不生憍慢故不凌易
衆生是名阿鞞跋致相復次若菩薩得無生
法忍入菩薩位得受記即時執金剛神王等
法應隨逐守護得佛道時則現其身時令人

見此中自說因緣若人若非人無能破壞人
破者若殺若縛若論議得勝等非人破者與
病人令狂若奪命若作惡身令其恐怖若變
作佛身說邪道如是等不能折伏菩薩問曰
若爲金剛神王所守護者菩薩自無有力答
曰菩薩亦自有力復以菩薩功德故能使金
剛神所守護金剛神所守護故雖未得法身
而功德增益又使天神見金剛神侍衛故益
加敬畏具足菩薩根者如人無眼等五情根
則無異木石五情力故能見能聞菩薩心中
無信等五根即是凡夫不入聖數問曰如阿
毗曇經說誑誑成就五根不斷善根者

今何以言無信等五根即是凡夫。答曰：不斷善根衆生，雖成就五根而不能發起爲用。譬如小兒雖成就煩惱，姪欲等未能發用，故言無信等五根亦如是。衆生雖有不發不用，是故不數信等五根有二種：一者屬聲聞辟支佛，二者屬佛。諸菩薩屬聲聞辟支佛，五根能深信，涅槃能以智慧知世間無常空，能知涅槃寂滅。菩薩五根生深慈悲心於怨惡衆生，亦能觀諸法實相，所謂無生無滅等。雖未得佛，亦能信受佛事，復有以菩薩根故能見能聞，能知諸佛神通力，非諸聲聞辟支佛所及。如不可思議解脫經中說：舍利弗，目連須菩

提等雖在佛左右以無菩薩根故不覺是大
菩薩會及所有神通力亦不聞佛說不可思
議解脫是故說若菩薩具足得是信等五根
故名阿鞞跋致問曰餘經中說善人身口意
業無惡知恩報恩能爲一切衆生故自捨身
樂安隱衆生有所利益不求果報如是等上

人相何以故但說不散亂心行無上道一事
名爲上人答曰此中佛自略說一心不散亂
盡攝諸善法何以故貪重佛道故一切諸煩
惱折薄是故於衆生深加慈心能自以身命
給施何況不知報恩等常一心念阿耨多羅
三藐三菩提清淨持戒故不行邪命所謂不

作祝術合藥祝術者能醫身令人不見能變
人為畜獸如是等種種祝術合藥者餽食求
仙亦合和諸藥療疾求財及求名聲祝鬼者
有人欲知未來事祝鬼令著男女問其吉凶
生男生女壽命脩短豐樂勝負等若有作者
為攝眾生破其憍慢不為財利名聞何以故
是人知一切諸法自相空故不見諸法相故
謂己身妻子男女等不見是相故不行邪命

大智度論卷第七十三

釋第五十五品訖
第五十六品上


表

妬反一故挑悔正徒正吊反作掉庠序上音德穢上烏

鹿獷下俱反教詔上音古孝反諂媚下眉反辛酸下蘇

官邪徑下古凌易上音陵虜掠上音魯下昔

些音憂感下倉反鉗巨兼反祝術上呪又音魯下仍



4

